

# Powšitkowne WOZJEWJENJA

njedźelu, 22. decembra 2013

## TCM – „Łužica pomha“ prosy wo šćedriwe dary

Towarstwo Cyrila a Metoda z.t. (TCM) chce ze swojej lětušej pomocnej akciju „Łužica pomha“ džěło rjadnicow w Albanskej podpěrać. Projekt bu njedźelu, 1. decembra, w Katolskim Posole předstajeny. TCM prosy wěriwych wo šćedriwe dary na konto Cyrill-Methodius-Verein, kontowe čisło 828 23 66, BLZ 750 90 300 pola banki LIGA-respektiwnje IBAN DE65 750 90 300 000 828 23 66, BIC GENO DEF1 M05 pod hesłom „Łužica pomha“.

*J. Špitank, předsyda TCM*

## Hodowny nyšpor w Róžeńće

Chór Lipa wuhotuje njedźelu, 29. hodownika, w 17 hodź. w Róžeńčanskej cyrkwi swój tradicionalny beneficny nyšpor. Zaklinča mjez druhim nowe serbske, česke a łaconske chórowe kaž tež instrumentalne twórby. Zběrka při durjach budže za hnadownu cyrkej. Wšitcy lubowarjo hodownych zynkow su lubje přeprošeni.

## Meditaciski koncert silwester w Baćonju

Z hudźbu a spěwom, z modlenjom a rozpominanjom chcemy lěto Knjezowe 2013 w zmysle „Wšo w Božim mjenje spočinam a w Božim mjenje dočinjam“ zakončić. K tomu přeprošujemy wšitkich wutrobnje na meditaciski koncert wutoru, 31. hodownika, w 19 hodź. do Baćońskeje cyrkwyje. Hudźbne wuhotowanje je lětsa Radworski chór Meja přewzał. Nimo spěwow zaklinča tež instrumentalne kruchi a pokazaja so swětłowobrazy.

*Baćońska wosada*

## Nowolětnej koncertaj w Radworju

Swojej nowolětnej koncertaj wuhotuje chór Meja sobotu, 4. januara, dwójce w Radworskim hosćencu „Meja“. Radworska wosadna šola znowa w programje sobu skutkuje. Přeni koncert w swětle swěčkow budže w 15.30 hodź. Swačina so wot 15 hodź. poskići. Dalši koncert wuhotuje so w 19 hodź. Přizamknu so reje ze Symanom Donatom. Wšitcy su wutrobnje do Radworja přeprošeni.

## Hodowny koncert w Chróścicach

Tradicionalny hodowny koncert Chróścanskeho cyrkwinskeho chóra z instrumentalistami a solistami wotměje so njedźelu, 5. januara, w 14 hodź. w tamnišej wosadneje cyrkwi. W swojim programje zanjese spěwarki a spěwarjo nimo někotrych serbskich hodownych spěwow mjez druhim Te Deum Johanna Adolfa Hassy a Magnifikat Jana Dismasa Zelenki.

## Koparski turněr wo pokal TCM

Towarstwo Cyrila a Metoda z.t. (TCM) zarjaduje sobotu, 4. januara, w 13.30 hodź. w Chróścanskej „Jednoće“ halowy koparski turněr wo pokal TCM. Přeprošene su wosadne a wjesne mustwa młodžiny. Kóžde mustwo měło z wosom hrajerjemi nastupić. Hrač budže so z třomi koparjemi a jednym wrotarjom. Přizjewić měli so mustwa hač do pónđzele, 30. decembra, pola předsydy TCM Jurja Špitanka, telefonowe čisło (03 57 96) 9 63 47 abo mobilnje pod (01 72) 7 97 38 29.

## **„Misija wuchodny wětřik“ tež we Łužicy**

Młodzi ludžo w starobje 18 do 35 lět změja jako „Misija wuchodny wětřik“ wot 28. decembra hač do 5. januara w Radworju swój kwartěr. Wot pjeć lět organizuje pater Paulus Maria Tautz ze zhromadženstwa franciskanow wobnowjenja tute misije po cyłej Němskej. Z hudźbu a swojej přitomnosću swědča woni wo swojej radosći z wěry. Staciju w Radworju změje „Misija wuchodny wětřik“, zo by so do wosadow w Budyšinje, Radebeulu a Sebnicy podała a so tam z młodymi ludźimi zetkała. W Radworju wuhotuja njedzelu, 29. decembra, w 10.30 hodź. kaž tež wutoru, 31. decembra, w 16 hodź. kemše a wot 23.15 do 0.00 hodź. nyšpor, stajnje z modernej hudźbu. Na to su wšitcy přeprašeni. Do Budyskeho klóšterka klarisow su młodostni pjatk, 3. januara, w 16 hodź. na „Misiju wuchodny wětřik“ přeprašeni. W 19 hodź. scěhuje holy hour. To je wšěm wotewrjene, džěcom, młodostnym a dorosćenym. Wječor budže z hudźbu a meditatiwnym modlenjom wupjelny.

## **WUSMUŽ předstaji swoju přěnu CD**

Skupina WUSMUŽ přeprašuje wšitkich na swjedžen składostnje wudaća přěnjeje swójskeje CDje sobotu, 28. decembra, do Worklečanskeho hosćenca. Spočatk je w 20 hodź. K rejam zahraje skupina LogaRytmus.

## **Kubłanske dny w Schmiedebergu**

Kubłanske dny serbskich młodostnych w Schmiedebergu budu wot štwórtka do njedzele, 2. do 5. januara. Přizjewjenja přijimaja so hač do pjatka, 20. decembra, w Dekanatnym dušepastyrstwe we Worklecach pod telefonowym čisłom 03 57 96 (9 55 95) abo z mailku na [don.boskowy-dom@t-online.de](mailto:don.boskowy-dom@t-online.de)

## **Mandźelske seminary 2014**

Termíny mandźelskich seminarow za přichodne lěto su 14./15. měrca, 28./29. měrca a 28./29. nowembra w Smochćicach. Přizjewić měli so zajimcy pisomnje pola Dekanatneho dušepastyrstwa, Młynski puć 4, we 01920 Worklecach. Formulary k tomu móža sej w cyrkwjach sobu wzać.